

■ TRIBUNA POLITICA

Gieus olimpics en il Grischun? Ma franc!

DA CHRISTIAN RATHGEB,
CUSSEGLIER GUVERNATIV*

Il siemi da gieus olimpics en il Grischun pudess daventar realitad l'onn 2022. Cun sia missiva ha la regenza grischuna stgaffi in'emprima basa per questa occurrenza gronda. Uss è il «puc» en la sessiun da december tar il cussegl grond. Cun in'annunzia d'auta qualitat sa posiziuneschan il Grischun e la Svizra sco lieu optimal per realisar gieus olimpics persistents e porschan ina vaira alternativa als svilups dals ultims decennis. Cun persuasiun di jau gea a gieus persistents.

Per ch'il siemi da gieus olimpics na daventia betg in dischariel occupa il tema da la segirezza ina posiziun principala sin la glista da prioritads da la regenza. Quai è impurtant perquai che la populaziun ha il dretg ch'ils basegns elementars – e tar quels tutga en emprima lingia la segirezza – possian vegnir garantids er durant in'occurrènza gronda. Il svilup da la situaziun da segirezza fin l'onn 2022 na po oz betg vegnir giuditgada definitivamain. Sch'ins parta dentant da la situaziun da segirezza actuala sun jau persuadì fermamain che la segirezza po vegnir garantida als gieus olimpics d'enviern 2022 en Svizra. Latiers tutgan la segirezza per las atletas ed ils atlets, per las assistentas ed ils as-



sistents, per ils giasts e per las medias e natiralmain la segirezza per la populaziun da noss chantun.

La segirezza en il Grischun è chausa da la Polizia chantunala dal Grischun. Di per di procura ella per la segirezza da la populaziun indigena e dals giasts en las vals e sin las muntognas, da bella e da mal'aura, la stad e l'enviern, di e notg. La Polizia chantunala dal Grischun ha er la responsabladad principala per la segirezza durant ils gieus olimpics l'onn 2022. Quella po vegnir garantida mo cun forzas unidas. Tut ils corps da polizia chantunals ston sustegnair il chantun Grischun en il rom d'ina uschenunada acziun interchantunala da la polizia (Ikapol). Medemamain d'ina uschenunada da l'armada, d'organisaziuns partenarias privatas e da forzas polizialas da l'exteriur vischin. Tut en tut d'ord vista actuala 2500 polizistas e policists, 5000 ap-

partegentas ed appartegnants da l'armada ed 800 appartegnants ed appartegnants da la protecziun civila. Vitiers vegnan forzas da las organisaziuns da segirezza da la confederaziun, dal corp da guardias da cunfin e d'ulteriuras organisaziuns d'intervenziun d'urgenza.

Ils custs per la planisaziun e per la realisaziun da mesiras da segirezza en connex cun ils gieus olimpics d'enviern 2022 importan actualmain 406 milliuns francs. Var 250 milliuns da quels sto il maun public surpigliar. Ils ulteriurs custs van a quint dal preventiv da l'occurrènza. Percunter survegnan il Grischun e la Svizra ina plattafurma unica da sa preschentar a tut il mund. Il grad d'enconuschientscha da noss chantun po vegnir augmentà, la rait da relaziuns rinforzada ed extendida. A medem temp profitescha il Grischun d'investiziuns en las regiuns ed en las infrastrukturas. E quai serva er puspè a la segirezza en noss chantun.

Jau sun persuadì ch'ils gieus olimpics 2022 han in effect positiv per il svilup dal Grischun e surpigli sco cusseglia guvernativ ch'è responsabel per la segirezza gugent questa sfida ensem cun la Polizia chantunala dal Grischun.

* Christian Rathgeb è schef dal Departament da giustia, segirezza e sanadad dal Grischun